

咱攏是見證人

孫少汶傳道師

經文：帖撒羅尼迦前書 1:1-10

- 1 保羅、及西拉，以及提摩太批寄互帖撒羅尼迦人的教會，就是恁佇父上帝及主耶穌基督的。願恁得著恩典、平安！
- 2 阮為著恁眾人常常感謝上帝，佇祈禱的中間數念恁，
- 3 佇上帝咱的父的面前，長長數念恁有信就行做，有仁愛就著磨，有向望咱的主耶穌基督就吞悞。
- 4 上帝所疼的兄弟啊，阮知恁的受揀選；
- 5 因為阮的福音到佇恁，毋是在佇講話若定，是在佇權能在佇聖神，及堅固的信，親像恁知阮佇恁中間，為著恁來成做甚麼等號的人。
- 6 閣恁已經佇多多苦難，用聖神所賞賜的歡喜，來承受道理，就學阮也學主；
- 7 致到恁做馬其頓、亞該亞攏總信的人的模樣。
- 8 因為主的道理對恁傳出。毋若佇馬其頓及亞該亞若定，就是恁向上帝的信已經逐所在報揚；致到阮毋免講甚麼。
- 9 因為 in 家己報明講阮到恁中間是甚麼款，也恁怎樣有離開偶像，歸佇上帝，來服事活閣真的上帝，
- 10 也聽候伊的子對天落來，就是伊對死人中互伊復活的耶穌——是彼個拯救咱出將來的受氣者。

一. 前言：用一生成為見證人的「彭蒙惠老師」

大家最近應該攏有看著這個新聞，就是一生奉獻互咱台灣的彭蒙惠老師，佇頂兩禮拜二 8 月初 6 蒙主恩召。相信大家內心有多多的毋甘，因為無論是咱學生時代，陪伴咱的「空中英語教室」。或者是透過音樂來傳揚福音的「天韻合唱團」，攏是彭蒙惠老師所創辦。他佇小漢 12 歲的時，就受著上帝的呼召。當時他參加一個夏令營，台頂來自亞洲的講師問大家講：「有誰人願意去幫助遐的人民的需要？」彭蒙惠老師完全無躊躇的舉起手，大

聲講：「我欲去！我願意去！」自按呢他及上帝立約，一世人成作上帝福音的使者。

當彭蒙惠老師佇 1951 年 tú 來到台灣花蓮的時陣，講真實，他毋知影欲做什麼，總是他深深相信上帝一定知影。所以他做一個決定，他決定單單跟隨上帝，上帝要他做什麼，他著做什麼。親愛的兄弟姐妹，佇現在上帝也 teh 呼召咱每一個人，呼召來成作祂福音的見證人。雖罔咱可能毋知影欲怎樣做，總是當咱有這個心志，就親像彭蒙惠老師同款，向上帝舉起手講：「主啊！我欲！我欲成作福音的使者、我欲成作福音的見證人。」相信上帝也欲使用咱，成作咱的教會、咱的家庭、咱的小組大大的祝福。

彭蒙惠老師講過一句話，他講：「聖經裡面並無退休這個詞，反倒是用生命影響生命。因為生命並無退休，只要上帝閣欲使用她，她就 Never Give Up（永遠無放棄）！」親愛的兄弟姐妹，面對上帝的呼召，咱無退休的一日；面對祂的福音，有時咱毋免特別做什麼，只干若活出耶穌基督的款式，用生命影響生命，其實就有夠額啊！所以佇信息的上起頭，我想欲問大家一個問題：「現在的我，現在的你，現在的咱，甘有活出主的見證勒？」che 真值得咱作伙來思想。

二. 經文背景：在患難中，仍活出見證的「帖撒羅尼迦教會」

自這禮拜開始，咱活潑的生命靈修進度，來到帖撒羅尼迦前書。帖撒羅尼迦教會，是保羅佇第二擺的宣教旅程來建立的。當時保羅佇遐熱心傳揚福音，佇會堂中間宣傳耶穌就是基督的福音。就佇差不多一個月左右的時間，有多多的猶太人、希臘人、婦仁人來信主。看起來福音的發展非常成功，無拘卻引起其他猶太人的無歡喜。無信主的 in 充滿怨妒、赤目，認為保羅來侵門踏戶。就開始壓迫 in、擾亂 in，大大譏謗保羅及帖撒羅尼迦教會。in 聚集匪類去到信徒的厝內，欲抓保羅及遐的信徒，甚至閣去到官府面頭前黑白講話。遮個行為造成整城受著大動亂，致使保羅不得不離開帖撒羅尼迦，先家己一人去到雅典，續接閣去到哥林多

教會。

毋若保羅受趕走、教會受著大迫害，遮的信徒閣需要面對太多的患難，頭一個是外邦希臘羅馬文化的衝擊、第二是傳統猶太教的壓迫，最後是異端諾（Lòk）斯底主義等等的影響。佇這個大苦難的時刻，普通人可能就按呢放 sak 信仰，倒去到原底舒適的生活。總是帖撒羅尼迦教會的信徒，卻佇這款的困境中間，無受著拍倒。in 反倒是表現出極大的信心、疼心、向望及吞悞。佇短短一兩年內面，教勢大興旺，主的道對 in 中間開始大生 thòa^a。in 也成作馬其頓（tùn）、亞該亞，以及其他多多所在信徒的模範。che 互保羅受著大安慰，特別寫帖撒羅尼迦的 phoe 信，鼓勵 in 繼續堅持信仰，勉勵 in 佇真理、信心、疼心更加成長，也著向望耶穌基督第二擺的閣來。

三. 「岡山教會」迄今已 113 個年頭，仍屹立不搖傳揚主道、成為福音的見證者

其實咱岡山長老教會，佇 1911 年創立到今已經有 113 年啊！這中間有多多福音的見證人，in 就親像帖撒羅尼迦的信徒同款，成作咱信仰的模範。無論是源起頭的創辦人高再祝先生夫婦及起初的信徒。當 in 佇岡山看著福音的需要，就熱心投入傳揚福首。到佇後來信徒越來越多，教會建築物也經過竹啊造的、磚啊造的，到現在會使接納千人的禮拜堂。咱也照著需要陸陸續續來起造育仁樓、教育館及墓園。講著岡山教會佇福音中受著迫害，就得確欲特別講起，咱所敬疼的第二任牧師「蕭朝金牧師」。當時是二二八的時期，當他聽著政府欲派人來抓他的時，他無願意家己來逃亡。無願意放落教會的羊群，以及台灣的百姓，他講：「我是一位傳道人，就是伊抓毋著人，he 也是誤會，解釋一下著好。」後來他真正被抓，因為政治迫害來犧牲性命。甚至佇最後受處刑的時，猶原堅守信仰，面對兵啊要求他跪落來，蕭朝金牧師無欲照做，他大聲應講：「我干若跪天頂的上帝定若，我無愛跪人！」蕭朝金牧師雖罔佇患難中蒙主恩召，無拘他卻成作福音的見證人，將岡山教會福音的故事繼續寫落去。

毋若按呢，咱岡山教會也看著福音的使命，就佇大岡山地區分設梓官教會、燕巢教會、永安教會及彌陀教會。也曾為著兒童創辦過育仁幼稚園。佇福音策略及組織頂面，咱也推行過三福個人佈道事工、GLN 小組門訓課程、雙翼及幸福小組的養育系統。也特別創辦社區協會來經營松年大學、社區據點、兒童喜樂營及校園事工。遮攏是咱岡山教會自過去到今，所擁有的屬靈產業之一，所以咱也會定定看著其他的教會，來到咱教會參訪、觀摩、學習。我講遮呢多教會的歷史，就是欲喚起咱逐人記憶，咱對福音的熱情。因為咱岡山教會這 113 年以來，無論佇順境或者是逆境。咱每一個世代攏成作岡山地區福音的見證人、咱每一個世代攏成作其他教會福音的見證人及模範。我也邀請咱這個世代的兄弟姐妹，咱繼續佇咱岡山教會、佇咱的家庭、咱的職場校園，成作福音的見證人。

咱倒來看帖撒羅尼迦教會，為什麼保羅稱 in 是所有信主的人的模範？為什麼 in 會當成作福音的見證人？咱佇第三節就通看出有三個面向，分別是信心的表現、疼心的表現，以及向望的表現。所以今仔日咱就作伙透過這三點，同齊來思想咱信仰的表現，互咱每一個人攏通成作福音的見證人。

四. 信心的表現：靠信心所做的工

頭一個面向是「信心的表現」，第三節講：「恁靠信心所做的工。」這真好來理解，咱所做的工攏是來佇咱的信心，這個工是上帝的工。當基督徒內心有信心，這個信心就會透過他的所行來展現。咱也通透過他的所行，來看著他內在的信心，這是一體雙面的。就親像我過去曾舉過的例，若是一位 ang-sài 定定對他的某講：「我全世界只愛妳一個，妳是我的寶貝。」總是他卻逐工四界去浪溜噠、lōa-lōa-sō，無愛 tiàm 佇厝、無愛倒 chhōa 子、無愛做家事、什麼代誌攏放互爛。請問這位 ang-sài 甘有真正愛他的某？無嘛！因為他只是一支嘴 ho̍-luì-luì，他的行為就無法度表現出他的愛。

所以一位基督徒對主有信心，絕對 bōe 使嘴講講 leh 準 tú

息，他一定會有帶有信心行為的表現。雅各書第二章也講著：「只有信心，若無行為，是死的。因為信心及伊的行為平平進行；信心通過行為來得著完全。」透過這句經節，咱就通知帖撒羅尼迦信徒的信心及行為是相進行的，in 的信心對叨落來顯明出來？對學保羅及學主基督來顯明，in 願意放落家己的老我，開始學習一個新的生活款式。將家己 tiàm 佇聖神中間，成作一個新創造的人，並且用 in 的所行、in 信心的工來展現出來。這個款式就是 in 離開所有的偶像，無閣敬拜假神。越倒身歸佇上帝，閣認真來服事上帝。甚至保羅講 in 所做的，就成作所有信主的人的典範。

親愛的兄弟姐妹，咱攏相信上帝，而且對上帝有信心的人。若按呢咱的信心及咱的行為所行，甘有平平來進行 leh？咱的信仰甘有成作別人學習的對象？或者是咱的信仰，定定互別人跌倒 leh？有一句俗語講：「言教不如身教，言傳不如行動。」無論咱信主外久、有外 gâu 講道理，攏不如咱的生命，活出一個活活的見證來得要緊。所以總歸一句話：「咱的信心需要藉著行為來展現出來。」

五. 疼心的表現：出佇疼心的勞苦

第二個面向是「疼心的表現」，第三節講：「出佇疼心的勞苦」。對帖撒羅尼迦的信徒來講，雖罔牧者保羅不得不離開 in。總是 in 無看環境的壓迫、無看別人的眼光，猶原堅持來服事這位閣活閣真的上帝，猶原堅持用仁愛、用疼心來服事主的教會。這個疼心佇原文是「agape 的疼」，意思是屬佇上帝的疼、是無條件的疼、是完全的疼、是主動的疼。就親像上帝疼咱人一樣，是無邀求任何回報的疼。真正的疼心會佇看無家己，無條件的付出關懷、付出疼的行動。是會親像耶穌基督願意犧牲、願意拋命，就是為著欲成全教會、成全群體。

總是為什麼保羅會講是出佇疼心的勞苦？咱會當想看 māi，當耶穌被抓了後，互人 siàn-chhùi-phóe、用竹啊 sut 頭殼、受鞭打、受 phui-nōa、受侮辱。無罪的耶穌成作贖罪的羊羔，為著咱的罪釘

死佇十字架頂，這付出外大的代價？這等等所有的代價，耶穌甘有要咱受？耶穌無要求咱受，因為祂已經承擔啊！因為祂已經付出極大的代價啊！所以當咱成作基督徒，咱領受上帝的疼，也會親像這款無私的疼，願意承擔多多的勞苦。這個勞苦毋是委屈、毋是虛假、毋是免強。這個勞苦是對佇上帝 agape 的疼，所以咱願意承受。

就親像父母因為疼囡啊！願意犧牲家己睡眠的時間，三更半暝起來泡牛奶、換 jiō-chū-á。父母因為疼囡啊！願意打拼賺錢來養飼 in，就是為著互子兒女一個好的生活。這中間一定充滿多多的勞苦重擔、多多的辛苦著磨，總是每一位父母願意按呢，攏是出自疼的緣故。就親像牧者為主獻身，一天二十四點鐘的付出，絕對毋是因為欲領謝禮，是因為疼羊群的緣故。就親像長老執事願意承擔職份，絕對毋是因為閒閒無代誌做，是因為疼教會的緣故。就親像區長小組長，需要定定撥時間來關懷小組員，處理 in 多多的問題。絕對毋是因為 in 時間足多，是因為疼小羊的緣故。甚至佇頂個月，高雄風颳天 siàng 大雨，四界淹水的時，咱有一位兄弟閣來到教會整理花園。絕對毋是因為他疼遮的花草，是因為他疼教上帝的家、疼上帝的花園。

親愛的兄弟姐妹，當咱領受主的疼，咱就會用這款疼來疼主的教會、主的百姓。雖罔這中間會有多多的勞苦，這個勞苦是福音事工頂面的勞苦。總是上帝攏知影、上帝攏悅納、上帝得確會紀念。願咱堅持到底，親像頭前彭蒙惠老師所講過的話：「只要上帝閣欲使用她，她就 Never Give Up（永遠無放棄）！」

六. 向望的表現：向望咱的主耶穌基督就吞悞

最後第三個面向是「向望的表現」，第三節講「向望咱的主耶穌基督就吞悞。」吞悞對咱台灣人來講，是一個卡負面的言詞。總是佇原文毋是消極被動的行為，反倒是一個主動、有氣力的堅忍。為什麼帖撒羅尼迦的信徒願意吞悞，是因為 in 有向望，向望等待耶穌基督第二擺的降臨。就是因為有這個應允，in 面對迫害的時才通吞悞，繼續服事上帝、繼續傳揚福音、繼續活出見

證。

毋知影大家這兩個月甘有看奧運？為什麼選手願意佇日常開多多的時間，流血流汗打拼訓練？就是因為他有一個向望，有一個目標，就是會當佇賽場頂面得著獎牌。這擺奧運閣一擺拿得金牌的選手李洋，他曾講過：「堅持規律的生活，堅持逐天相款的訓練，是因為我有家己的夢及目標。」因為有夢、有目標，就成作他日常訓練時的動機及動力。親愛的兄弟姐妹，咱攏是有向望、有目標的人。就親像三十幾年前，當咱 teh 起這棟禮拜堂的時，對有這個念頭、到開始動工、一直到最後的落成。相信彼時每位兄姊攏相信講，將來咱會佇這個禮拜堂中聚會；佇現在咱一直期待，相信將來會有千人佇遮作伙敬拜上帝的景象。這就是咱的夢、咱的目標。

總是對咱基督徒來講，咱上大的向望是什麼？絕對毋是開好車、住好額厝。咱上大的向望是將來有一日，咱會使遇著彼位閣活的主。祂欲來迎接祂的百姓，互咱通進入新天新地，佇祂的國度裡面及祂永遠佇 teh。奧運選手無一定會拿著獎牌，總是咱的向望是上帝親自應允的，得確 bōe 空空。哥林多後書 4:17 記載講：「阮所受此個暫時閣小可的艱苦，是欲互阮得著 bōe 通比，閣較大，永遠的榮光。」請咱毋通失去向向望等待的心，著注神看將來的榮光。就是因為有這個應允，咱才通繼續吞悞。所以吞悞及向望這兩個有積極正面的意義，毋是要咱自憐自哀、毋是要咱委屈求全。乃是無論咱因為福音的緣故、為著服事的緣故，減采遇著大風湧，咱猶原會使勇敢靠主站在。互咱有信心、有勇氣，繼續為主來爭戰好的爭戰。

七. 結論：咱已經攏是「主的見證人」！

結尾來講，咱的信心是向佇上帝、疼心是向佇別人，向望是向佇家己。通互咱佇主閣來的時，通得著完全的救恩。所以信就帶出行動、行動中就有疼心、疼心就無驚勞苦、勞苦中著向望主，最後咱逐人的生命，就通見證主的榮光。以上所講的，也就是咱信仰的核心：「信、望、愛」。幫助咱重新注目佇上帝的身

上，佇聖神的更新中間，成作一位新創造的人。

親愛的兄弟姐妹，今仔日是我及家茵傳道，佇咱岡山教會服事的最後一個禮拜。代先欲感謝上帝的帶領，揀選阮來到岡山教會；感謝蔡牧師、葉牧師的陪伴與教導，互阮通學習怎樣牧養群羊、治理教會；也對心底感謝大家的接納，互阮成作恁的牧者，通作伙服事、彼此扶持。佇這三年以來，定定聽著恁鼓勵阮的聲、為阮代禱的聲。也有多多的兄姊，用實際的行動支持阮、陪伴阮。互阮對 tú 畢業的菜鳥傳道師，到今漸漸成長，也欲佇將來成作一位牧師。繼續帶著這份信、望、愛，來牧養主的教會。今仔日的經文第 1 節到第 2 節，保羅對帖撒羅尼迦信徒講：「願恁得著恩典、平安！阮為著恁眾人常常感謝上帝，佇祈禱的中間數念恁。」佇未來的日子中間，咱雖罔無法度定定見面。總是咱會使佇祈禱中數念彼此，佇祈禱中為彼此感謝上帝，佇祈禱中願彼此攏通得著平安及恩典。

佇過去無論是帖撒羅尼迦教會，或者是咱岡山教會的信仰前輩，in 佇當時的患難中，猶原堅守信仰、活出福音、成作主的見證人。佇今仔日我也看著咱岡山教會的兄姊，咱已經成作主的見證人、已經成作福音的見證人。相信 che 攏是上帝的恩典、攏是大家信心的所行、咱疼心的勞苦，以及咱向望的吞慳。佇最後 hām 大家分享一節經文，記載佇希伯來書 12:1：「既然有 chiah 呢多的見證人，親像雲包圍咱，咱著排除一切的阻礙，及一直 teh 纏絆（tīⁿ-pò^a) 咱的罪，堅忍跑走頭前的路程。」鼓勵所有的兄弟姐妹，互咱親像帖撒羅尼迦教會及咱岡山的信仰前輩，勇敢壯膽為主作見證。排除所有的阻礙及絆（tīⁿ-pò^a)，繼續向所插的標來跑走。互咱繼續譜寫家己生命的故事，相信當咱每一個人的故事 kap 作伙的時，就得確欲成作咱岡山教會活活的見證，將一切榮光攏歸互主。